



Nunatsinni tarnimikkut napparsimasut atugaat pillugit iliuusissat pitsanngorsarneqarnissaat siunertaralugu nuna tamakkerlugu iliuusissamik pilersaarummik Naalackersuisut UKA2021-mi saqqummiusseqqullugit Inatsisartut aalajangiiffisassaatusiunnersuut.

(Inatsisartunut ilaasortaq Mikivsuk Thomassen, Inuit Ataqtigiit)

(Siullermeerinnineq)

Timikkut nappaatit timikkullu unammillernartut ilaatigut ajornanngitsuaqqamik paasineqarsinnaasarput. Taleq qerattaqqutilik napsimasutut paasinarsititsisarpoq. Isarussat arlaatigut isiginiarnitsigut unammillernartoqarsimaneranik paasinarsititsisarput. Tusialaarneq nissutta arlaatigut ajortoqarneranik paasinarsititsisarpoq. Kakkilertaguttalu nuffasersimanitsinnik imaluunniit nualluummik eqqugaasimanitsinnik paasinarsititsisarpoq.

Unammillernartut taamaattut uagut inuttut eqqarsaatiginagu iliuuseqarfigeqqissaartarpagut, taamaaliortuassaagullu.

Kisiannili nappaatit unammillernartulluunniit takuneqarsinnaanngikkaangata – tarnikkut nappaataagaangata - uagutsinnut ajornartuusinnaavoq. Tarnikkut nappaatinut tunngatillugu amerlasoorpassuit eqqartuinissaminut annilaangasarput. Oqaloqatigiissutigissallugit artornarsinnaavoq. Ilaatigut eqqugaasimasumut eqqartuinissaq ajornarsinnaasarpoq inuiaqatigiit akornatsinni tarnikkut nappaatinut ilisimasatta naammannginneri peqqutaallutik.

Tarnikkut nappaatit akueralugillu ataqqinerulernissaannut uagut inuiaqatigiittut pikkorinnerulertariaqartugut Demokraatitit qularineqanngilaq, taamaammallu inunntut tarnimikkut nappaatilinnut suliniutit nukittorsarniarlugit nuna tamakkerlugu iliuusissatut pilersaarummik suliaqartoqarnissaanik kissaateqarneq tapersorsorparput.

Tamanna oqaatigereerlugu massakkoqqissaaq Peqqisutsimut Naalackersuisoqarfimmi sulisut amerlanerpaartai COVID-19-imut atatillugu suliniutinik ulapputeqartut puigussanngilarput. Taamaattumillu siunnersuuteqartut siunnersuutaa malillugu siunnersuutip UKA 2021 nallertinnagu piviusunngortinneqarnissaa piviusorsortutut isiginngilarput.

Taamaammatt Naalackersuisut allannguutissatut siunnersuutaat ima suliaqqinneqartussanngorlugu innersuussutigaarput, iliuusissatut pilersaarut aatsaat UKA 2022-mut atatillugu saqqummiunneqassasoq.

Paasinnineq tamanna najoqqutaralugu siunnersuut Ilaqutariinnermut Peqqisutsimullu Ataatsimiititaliamut suliassanngorteqqillugu innersuussutigaarput.